

2019 Ils Pazlongs

Ob oba-n-ohni oder mit
Das Hörnerschiss verstoni nit
Bir SVP vum Brunner Toni
Sind doch au alli oba-n-ohni

An Zeck sait keck zur Tigermucka
Hau ab du Sack vu minam Rucka
Scheiss Wirtschaftsflüchtling echt du nervsch
Do gilt no immer Zecka förscht

Und überhaupt vor minam Biss
Hän öppa langsam alli Schiss
Zum miar massiv an Karra fahra
Bruchts meh als nu Pro specie rara

Das Zölibat as hät kai Zweck
Drum sait dr Papscht: Das muass awägg
Susch sind, und das wär gär nit cool
Am Änd no alli Pfarrer schwul

Är selber sei im Fall nit schwul
Zum Flörta aber aifach z'fuul
Doch wenn denn schu a Spatz ir Pfanna
Kömm kaini an d'Madonna ana.

Fascht 35 Grad im Schnitt
A sona Hitz goht aifach z'wit
Susch kunnt dr Marti nu mit sitza
Und ohni schaffa schu ins Schwitza

Man weiss es leider nicht genauer
Es warten Herren in einer Sommernacht
In einem Haus mit dicken Mauern
Auf das Kuvert, das einer mitgebracht

Man nimmt den Umschlag ohne fragen
Die Herzen schlagen, der Handel ist perfekt
Durch eine geniale Wende, kriegt so am Ende
Jeder sein Bauprojekt

Plötzlich lacht der Herr Minister
Denn er kennt dieses Geknister
Und er hat auf seinen Lippen
Eine kleine Melodie:

Tango Korrupti
Kunnt an Quadroni und entpuppt di
Nimmsch du diar aifach sona Anwalt
Wo öppis kann halt, und kusch schwuppdwupp davo

Und sötti d'Weko wella schnüffla
Dänn saisch du aifach däna Püffla:
In dä Kanton klaut kaina cleaner
Als miar Unterengadiner

Min Liablingsportler isch dr Schurter Nino
Er heisst zwar so, isch aber kai Latino
Graubünda Feria wetti er als Sponsor
Doch dia Calöri näman sich an Schott

Dänn het am Nino sina Boss empfohla
Er söll dr Stutz doch im Tessin go hola
So goht er piano piano uf Lugano
Jetzt hockt er döt, will nümma uffä kho

O Nino, o Nino, o Nino
Du muasch vu Lugano tornar
Liaber hüt als mora
Wänn miar au profittare
Und natürli nüt pagare
O no, no, no, no, no

Hoch auf dem gelben Wagen
Rumpelt's und stottert's vorn
Klänglich die Bosse versagen
Lustlos tschättert das Horn

Nach dem Bescheissen und Klauen
Und all den faulen Tricks
Sitzen jetzt im Dreck die Superschlaunen
Und wir fahr'n im Flixbus nach Panix

Nach soma schnöda Volksbetrug
Isch Asche aufs Haupt an schöna Zug
Doch d'Mängi wo ma brucht isch klii
S' muass nit a ganzi Garasch sii

As isch varbii, dr Stutz kunnt zruck
Doch d'Gaunerposcht blibt unter Druck
Jetzt täti nu no öppis nütza
Wenn d'Poscht wür d'Poschti schamrot sprütza

Hey Bane, säg, häsch du an Knall
Was söll am Turm dä doof Kristall
Das isch doch logisch, Mann, dasch mini
Reklama für dr Paul Membrini

Graubünda wird in däm Moment
Politisch vu Zürcher überschwemmt
Und was mi dra am meischta schellt
Miar Nögg hänn dia no selber gwählt

Zerscht d'Blocheri, dänn dr Christian Jott
Wenns witer goht im gliche Trott
Kunnt bald als nächschi Annektierig
Dr Roger Köppel in d'Regierig

Andersits, as isch kai Scherz
Hänn d'Zürcher au a grossas Herz
Wer nämmti susch und ohni Druck
An Pleite-Trainer wieder zruck?